

INUIT ATAQATIGIIT

Inatsisartuni



Aasiaat 18.juni 2018

UKA 2018/151

Inatsisartut suleriesianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Sisimiut Kangerlussuullu akornanni aqqusinermik qimuttuitsulluunniit aqquataannik pilersitsisoqassagaluarpat inuussutissarsiornikkut periarfissat suut pilersinneqarsinnaanersut pillugit apeqquteqaat aallaavigalugu oqallisissiaq.

(Inatsisartuni ilaasortaq Peter Olsen, Inuit Ataqatigiit)

Tunngavilersuut:

Naalakkersuinikkut anguniakkatta pingaaruteqarluinnartut ilagilluinnarpaat inuussutissarsiutitigut sutiugt tamatigut nutaaliornissaq, periarfissanillu nutaanik ineriartortitsinissaq pilersitsinissarlu.

Inuussutissarsiornikkut takornariaqarnikkullu ineriartortitsivigineqarsinnaasutut pilersitsivigineqarsinnaasutullu piukkunnarluinnartut ilagilluinnarpaat Sisimiut Kangerlussuullu akornanni nunatangaatsiarsuaq. Sisimiut Kangerlussuullu akornanni pisulluni ingerlaartarfik tuluttut “The Arctic Trail”-mik taaneqartartoq, ullumikkut takornarissat akornanni nunarsuarmi tusaamaneqarluartoq assersuutigiinnarsinnaavarput.

Sisimiut Kommunerisimasaata, massakkullu Qeqqata kommuneata ilaatigut ARTEK peqatalugu Sisimiut Kangerluussuullu akornanni sunik aamma qanoq inuussutissarsiunik pilersitsisoqarsinnaanera eqqarsaatigalugu misissuisitsisarsimavoq.

Qeqqata kommuneata nittartagaani takuneqarsinnaapput inuussutissarsiutit suut Sisimiut Kangerluussuullu akornanni ineriartortinneqarsinnaanersut pilersinneqarsinnaanersullu.¹

Isigiarsuttup kialluunniit periarfissarpasuit amerlangaarmata takunngitsoorsinnaanngilai. Takorluuisinnaaneq kisimi killiliisuvoq.

Aasaanerani nunap timaannarsuani eqqissimaariartorluni aallaarsimaarnerit, tatsini nalunnguarneq eqalunniarnerlu - tatsini qajartornerit, pinngortitamik kusanartorsuarmik uumasuinillu takornarniarneq, umimmaateqarsinnaanermik uumasuiveqarsinnaanermik, nunaateqarnermillu pilersitsiortorsinnaanerit soorlu; naatitanik naatitsivissuit, savaateqarsinnaaneq, kukkukuujuteqarsinnaanerlu.

Ukiukkut qimussernerit, pisuttuaatigaluni sisorariarnerit, Igdlo Mountain suleqatigalugu sisortarfissuarmik pilersitsineq, amerlasoorpassuuppullu Sisimiut Kangerlussuullu akornani takornariaqarnikkut inuussutissarsiornikkut ineriartortinneqarlutillu pilersinneqarsinnaasut.

¹ http://www.qeqqata.gl/Emner/Turisme?sc_lang=kl-GL

Nunap timaani nunatarsuarmik inuussutissarsiornikkut pilersitsiviusinnaasumik periarfissagissaartigisumillu nunatsinni allamik taama angitigisumik peqarunangilaq.

Assersuutitut taaneqarsinnaapput suleqatigiit Sikumiunik imminnut taasimasut. Naalackersui-sooqatigiit inatsisartut gruppiannut UKA 2017-ip nalaanni pilersaarutiminnik soqutiginarluin-nartunik saqqummiussaqaarnikuupput, ilaatigut Igdloo Moutain suleqatigalugu issittumi naleqquttumik uumasuusivimmik pilersitsisoqarsinnaaneranut sisorartarfissuarmillu pilersitsoqarsinnaanerani pilersaarutinut tunngasunik saqqummiivigineqarsimalluta.

Inuussutissarsiornikkulli takornariaqarnikkulli periarfissat assigiinngitsorpassuit tamakkua pilersinneqarsinnaangillat Sisimiut Kangerlussuullu akornanni aqqusinersuarmik imaluunniit qimuttuisut aqquataannik pilersitsisoqanngippat.

Naluneqanngitsutut Kommuninut, Nunaqarfinnut, Isorliunerusunut, Attaveqarnermut, Ineqar-nermullu Naalackersuisup Qeqqatalu Kommuneata borgmesterialu ulloq 14.11.2017-mi Sisimiut Kangerluussuullu akornanni aqqusiniliassaq pillugu suleqatigiisitaliortoqarnissaa pillugu atsioqatigiittoqarnikuupput.

Qularnanngitsorli unaavoq: Sisimiut Kangerlussuullu akornanni inuussutissarsiornikkut pilersinneqarsinnaasut amerlangaarput, taamaattumik tamanna pillugu apeqquteqaat aallaavigalugu oqallinnissamik siunnersuuteqarpunga partiit assigiinngitsut qulequttamut uunga pineqartumut isumaat qanoq ittuunersoq paaserusukkakku. Aqqusinersuaq pilersinneqassava? Imaluunniit qimuttuisut aqquataat pilersinneqassava? Imaluunniit qanoq taava qanoq iliussagut Sisimiut Kangerluussuullu akornanni inuussutissarsiornikkut periarfissat assigiinngitsorpassuit piviusunngortinneqarnissaat aqqtissiuukkumallutigu?

Matumuuna §37 naapertorlugu 2015-mi apeqquteqaatinntu akissut 167-imik normulerneqarsimasoq takussutissatut saqqummiuppara.²

Uummarissumik angusaqarfiulluartumillu oqallittoqarluarnissaannik kissaassillunga.

Qujanaq

² https://ina.gl/documents/para3637/2015/svar/167_GL_Kangerlussuaq_Sisimiut_aqqusineq_PEOL_akissut.pdf